

仁和縣志卷七

湖廣江陵縣知縣致仕仁和沈朝宣纂著

恤政

自古聖帝明王之臨御宇內雖常存心于天下而必加惠于窮民夫此窮民者居常孤子無聊形影相弔甚至飢無與食寒無與衣病無醫藥死無葬埋呻吟號泣殊可矜也仁君子于此何忍愬然于其懷耶緬自唐虞三代之後號善治者漢有文帝唐有太宗宋有仁宗其惠政之加終不逮古爲其乍行而有限也洪惟我

仁和縣志卷七

一

朝創制立法德澤旁行而可垂之悠久斯世斯民何其幸也仁和雖居一方而凡良法美政率先舉行為是乃志恤政

養濟院

宋崇甯元年詔諸路置安濟坊紹興三年詔臨安府置養濟院十三年又下仁和錢塘二縣路逐近城寺院充安濟坊籍定老幼貧乏不能自存者及乞丐之人每名日支米一升錢十文小兒半之府城內外以常錢米支給諸縣或給錢米或撥官田各命主首掌之仁和錢塘二縣合置

一在寶勝院一在艮山門外又善化坊四所元仍宋舊而頗增置日給錢米如宋而冬夏則加之布諸縣則以際留倉米支給又置慈幼局于樓店務對河淳祐七年令創屋慈幼局應遺棄小兒民間有願收養者官爲雇倩貧者就局乳視隨有願子之者從官請均給錢米如令

皇明洪武五年五月 詔天下郡縣立孤老院以孤老殘疾不能生理者許入院官爲依例贍養如或出外乞覓鄉市人民聽以餘贖之物助養其生敢有笞楚者有司以鬪毆論誣告者抵罪此等殘疾

仁和縣志卷七

二

之人如或痊可願出爲民人籍者聽從其便有司毋得稽留欽此定例每口月支米三斗柴三十斤冬夏布各一疋小口給三分之一後又改定曰

養濟院

七年八月

詔書一款兵興以來各處人民避難流移或有父南子北至今不能會養願還聚者有司送還鄉里或身死他鄉拋下老幼願還鄉者聽及各處鰥寡孤獨并篤疾之人貧窮無倚不能自存者著有司從實取勘官給衣糧養饘欽此其月給

一等隻身大口米三斗柴三十斤冬夏布各三丈小口十四已下月米二斗柴二十斤冬夏布各二丈

一等一家二口大二口月米五斗柴六十斤冬夏布各六丈大一口小一口月米四斗柴五斤冬夏布各五丈

一等一家三口大三口月米七斗五升柴九十斤冬夏布各九丈大二口小一口月米六斗五升柴八十斤冬夏布各八丈大一口小二口月米五斗五升柴七十斤冬夏布各七丈

仁和縣志卷七

三

一等一家四口大四口月米一石柴一百二十斤冬夏布各一十二丈大三口小一口月米九斗柴一百一十斤冬夏布各一十一丈大二口小二口月米八斗柴一百斤冬夏布各一十丈大一口小三口月米七斗柴九十斤冬夏布各九丈

十九年

詔書一款所在鰥寡孤獨取勘明白果有田糧未能除去差發者卽與除去無可自養官歲給米六石其孤兒有田不能自爲與免差役有親戚者官司

責令孤兒親戚收養

一款篤廢殘疾火速驗口收入孤老處關支使得
遂其殘生有司如命勿怠

三十五年七月初一日

詔書一款鰥寡孤獨有司依例存恤毋令失所人年
七十之上及篤廢殘疾者許人一丁侍養飢寒不
能自存者官爲振給

右具載之律令

敕令有司不得泛視巡按監臨按臨篤廢凡有

大詔令又莫不先之以深仁厚澤之惠鮮而哀憐獨

仁和縣志卷七

四

者無所不至吁其真

天地之仁也

仁和錢唐二縣附府

皇明洪武初 詔天下各置養濟院一所八年合創
于觀橋西北以元貢院基爲之房屋四列以元
亨利貞爲號每號百間共四百間東西各二百
間共列井四創造之初本縣地方遠錢糧多凡
一應材木石竹甃瓦灰土并工匠人夫之費本
縣出辦六分錢唐出辦四分若夫孤老月糧柴
薪冬夏布疋則各計口數而給之不在四六分

之列也

本縣民屬孤老固以本縣錢糧給養而軍屬左衛口每名口支米三斗共米一百九十四石一斗孤老亦附之以給養正德五年九月間民屬孤老男婦五十九名口月支米三斗共米一百七十七石每名口月支柴薪價銀二分共銀一兩一錢八分甲頭男婦一十名口每名口支米三斗共米三百每名口月支柴薪價銀二分共銀二錢冬夏各支布二疋共布一百三十八疋其月米支給預備倉存畱其柴薪布疋係本縣里

仁和縣志卷七

五

甲丁田銀內支給

正德五年養濟院民屬孤老男婦三百四十五名每名口支柴薪價銀一分共銀三兩四錢一分每名口支布三丈共布一千四十一丈每名口折布價銀一錢六釐共計三十六兩七錢八分一二釐

嘉靖二十七年七月養濟院孤老民屬男婦三百八十六名口軍屬孤老一名口每名口月支米大盡三斗小盡二斗九升柴薪花布折銀分作二季每名給銀六錢

按孤老之在養濟院者生死去留無常其數固有消長不一茲舉弘治正德嘉靖三年內數有可查者互列以見例耳若夫孤老之多寡與凡錢糧之多寡隨時消長不能逐年逐月計也

惠民藥局

宋元祐間郡守蘇軾嘗于城中創置病坊名曰安樂以僧主之仍請于朝三年醫愈若干人乞賜紫衣度牒一道復買田歲收租米千斛貲之公選朝官近臣有故人以金五兩銀二百五十兩爲餽公計卻之則逆意受之則傷廉乃悉送于杭用助買田而以書致謝意淳祐八年五月創

仁和縣志卷七

六

局製藥名曰施藥局分差職醫家至診視隨證畀藥日以爲常十年益以錢十萬令多方措置以賞罰課督醫者月以其數上聞有詣局以病狀自言者亦畀之藥

元至元初始置惠民藥局官給藥直設提領一員主之

皇明洪武三年命天下府州縣開設惠民藥局拯療貧病軍民疾患每局選設官醫提領于醫戶內選取內外科各一員今府醫學授正科一員主掌縣醫學授副訓科製藥惠濟其藥于各處出

產并稅課抽分藥材給降不敷則官爲買辦舊
置局八所後改爲一所置于西文錦坊之南大
街西

本縣統于府藥局此不另置

鄉厲壇

鄉厲壇計共三百三十所

皇明洪武八年定制各鄉村每里立無祀鬼神壇一
所謂之鄉厲祭無祀鬼神專祈民庶安康六畜
蕃盛每歲如府日期三祭祭物隨宜祭畢會飲
讀誓詞並與里社同

仁和縣志卷七

七

祭厲文某鄉某村某都某里里長某承奉本縣
裁旨該欽奉

聖旨普天之下

云云並同府厲祭文

今某等不敢有違謹設壇

于本里

以三月清明七月十
五日十月初一日

率領某人等百家

聯名于此置備羹飯等物祭享于本里無祀鬼
神等眾靈其不昧依期來享凡我一里之中百
家之內倘忤逆不孝云云並同府厲祭文保守鄉里如此
則鬼神有鑒察之明我輩非諂諛之人靈其無
私永垂昭格尙享

告城隍文某府某縣某鄉某都某里里長某等

率領某里人民某等聯名謹狀告于本府縣城隍之神今來某等承奉本縣官裁旨遵依上司所行爲祭祀本鄉無祀鬼神等眾事該欽奉

聖旨普天之下

云云並同府告城隍文

尚念冥冥之中有等不

在祀典之神不得血食之鬼魂無所依私顯靈怪悲號于星月之下呻吟于風雨之時憐其慘悽故敕天下有司依時祭享鄉村里社一年三祭仍命禮請本處城隍以主此祭云云並同府告城隍文欽奉如此今某等不敢有違欽于某年某月某日就本里設壇謹備羹飯穀物祭享于本鄉無祀

亡和縣志卷七

八

鬼神等眾然幽明異境人力難爲必資神力庶得感通今特虔誠告于神先期分遣諸將遍歷所在召集本鄉鬼神等眾至日悉赴壇所受祭神當承

敕命鎮控壇場鑒察善惡無私昭報爲此謹具狀白本縣城隍之神俯垂昭鑒謹狀

義塚

文王爲西伯時因掘池沼見死人骨命葬之吏曰此無主矣西伯曰有天下者

天下之主有一國者一國之主寡人固其主矣以衣冠更葬之天下聞之日西伯澤及枯骨況於人任由是觀之則後此義塚之設其有所祖乎

宋崇甯三年詔諸州縣擇高曠不毛之地置漏澤

園凡寺觀寄留椁櫨之無主者及暴露遺骸悉瘞其中各置圖立籍記識仍置屋以爲祭奠之所聽親屬祭饗著爲令永世遵守

宋紹興十四年詔臨安府措置漏澤園遂下仁和錢塘二縣悉行拘收爲藩籬以限之選僧二名主管月給常平錢五貫米一石瘞及二百人者申請朝廷衣紫旣又有旨令諸路軍州一體措置施行仍委常平司檢察自元以來俗多尚浮屠法其力不能自葬及暴露遺骸多以火焚甚至骨棄水中不立埋葬之所

仁和縣志卷七

九

皇明洪武三年欽奉

聖旨浙江等處火葬水葬好生有傷風化可禁止了恁省部家講究將來欽此禮部議得民間凡有死喪必須埋葬並不許焚化若貧窮無地者仰所在官司揀選擇附近城郭空閒寬闊山園田地設爲義冢以便安葬並不得焚化如有仍前不悛焚化骨殖棄置水中不行埋葬者坐以重罪若亡歿遠方子孫無力歸葬者聽從其便刑部著之律令

仁和縣與錢塘縣因附府共置漏澤園十二所逮

我

皇明二縣共置義冢五所一在錢塘門外一在葛嶺西一在方家峪此皆屬錢塘故不詳畝數四至今在清泰門外者一係新增在武林門外者亦新增

一在鳳山門外萬松嶺下計一十九畝五分坐落本縣似蘭隅四圍地方東至官街西至萬松嶺南至劉富墳北至官街

一在清泰門外計八畝二分坐落本縣會保隅五六等圍地方東至錢塘江岸西至洪速等地南

仁和縣志卷七

十

至行路北至本隅六圍并臨江十一圍地界

一在清泰門外計二畝坐落本隅地方東至姚鎮墳西至城河南至行路北至行路此係土工簡孟義願將自己收地輸官以置義冢

一在武林門外北新橋東計六畝四分九釐坐落本縣一都十四圍地方東至崇興寺水路西至崇興寺地南至崇興寺田北至官河此係里民姚明樂自輸財六十餘兩買地置塚外築周牆內植松柏構屋二間委人看守有司以聞提學副使張公鼇行縣以嘉義二字表其門閭

預備倉

宋

豐儲倉在仁和縣倉橋東

皇明

預備倉舊名老人倉洪武初令天下州縣鄉都各量置倉擇耆老一人主掌之故名其法凡遇歲豐縣官勸令當鄉足食之家義出米穀不等貯蓄官籍其數凶年許當鄉下戶貸借秋成抵斗還官著爲令有古義倉之遺意歲久頗就傾圮每

大詔赦之頒時敕有司舉行毋怠歲或饑饉鄉邑間有知義而獻給者焉有勸分而應命者焉正統初以言者戶部奏差刑部郎中劉廣衡巡行兩浙勸分預備因以老人倉改名預備受之仍籍自願獻官者與勸而分者多寡之數上之戶部請旌異焉視自獻米逾千石特賜璽書官爲樹表且復其家勸而分賜璽書但復其身又次璽書但立石其家以表追後又下冠帶榮身又錫以七品散官之令爲民勸義益多途矣又因言者凡大小衙門吏典三司知印承差府縣僧道

醫學陰陽官俱令入米有差免其考試就與職役又令一應囚徒所犯自笞以上至雜犯死罪凡有力者並聽入米贖罪本府遂以舊聖安倉改作預備倉收受歲亦不下萬有餘石皆所以備荒於未然者也

本縣預備倉洪武二十四年建歲久傾圮永樂三年知縣彭奎重建四所每所倉廩二十間

東倉在城東北臨平鎮

南倉在城北郭石灰場

西倉在城西北仲墅今廢

仁和縣志卷七

北倉在城北塘棲鎮

評曰倉號預備為凶荒設也其積穀取諸罪贖要在照時值征銀選委一二般實誠篤大戶掌管已至銀多論令傾成足色每十兩為一錠官給批文加以路費立限差往多穀地方擇買嘉穀差官監收其斗級止令收貯看守如此則穀雖年深自堪食用若令罪犯備穀上倉則官吏斗級留難以索分例遂使附近積好包納其穀未免偽雜一經查盤簸揚勢必虧耗其經手人員定遭問罪賠補若值凶荒窮民嗷嗷望食徒以不堪之穀發賑之其何濟于飢而救其命乎

壇廟

築土使高曰壇所以求神於無形建屋肖貌曰廟所以求神於有象然必守土者循官秩之崇卑以

爲祀事之主宰否則分不相倫氣不相感雖曰祀之其實瀆之書曰瀆于祭祀時謂弗欽記曰神不歆非類蓋以非類卽所弗欽非有見于幽明之故何能制祀若是其切且明哉唐虞世遠三代跡荒下至漢唐宋諸君皆非聖人在天子之位固不足以語上古之禮洪惟我

聖祖肇造區夏之後首命禮官講明祀典尊卑有序隆殺有差著爲條章頒行天下誠萬世不刊之典也仁和祀典悉附府統行但其廟宇之經營品物之措置不無賴于縣也爲是乃志壇廟

仁和縣志卷七

十三

壇

社稷壇此是府壇非邑壇也在錢塘門外尉司下扇其建置沿革禮部定到圖式儀註具見府志茲不復載但二祭牲品坐派仁和營辦雖則隨班行禮實無異于本縣專行也

風雲雷雨山川壇在鳳山門外包家山實係錢塘境內其建置沿革禮部定到圖式儀註具見府志其牲品雖坐派錢塘管辦而其隨班行禮則與錢塘一體也故載之

郡厲壇在武林門外霍山坊亦在錢塘境內例不

當載本縣與錢塘縣既統祭於府壇凡有祀事
亦有賴于本縣一年三祭其祭品坐派仁和管
辦清明日十月朔錢塘管辦七月十五日
城隍廟在錢塘寶月山例不當載然本邑與錢塘
皆統立于府凡祈禱雨暘疾疫并新官到任一
應牲帛祭品坐派二邑分辦故載之

里社計 所凡鄉村每里一百戶內祀五土五穀
之神專爲祈禱雨暘時若五穀豐登每歲一戶
輸當會者春秋二社祭以一羊一豕酒果隨用
祭畢令一人讀培強扶弱之誓其詞曰凡我同

仁和縣志卷七

古

里之人各守禮法毋恃強凌弱違者眾先罰之
然後經官或貧無可贍眾用給其家三年不立
不使與會其婚姻喪葬有乏隨力相助如不從
眾及犯姦盜詐僞一切非爲並不許入會讀畢
長幼以次就坐會飲盡懽而退務在恭敬神明
和睦鄉里以厚風俗祝文時維某年歲次月日
朔甲子某縣某鄉某郡某里某等謹致祭於五
土之神五稷之神惟神參贊造化發育萬物凡
我庶民悉賴生植時惟春東作方興謹具牲醴
秋歲事有成恭伸祈告伏願雨暘時若五穀豐登官賦足供

恭伸

祈告

伏願雨暘時若五穀豐登官賦足供

民食充裕神其鑒之尙饗

廟

嘉澤廟俗呼爲西井寺在湧金門北城下卽唐相國鄴侯李泌德宗興元間守杭有政績故民立祠祀之

李鄴侯祠在今豐樂橋東香餅子巷神名泌字長源德宗興元間守杭有政績郡故斥鹵鑿六井引西湖水入城民德之爲立祠宋嘉定中賜額嘉澤咸淳中潛安撫說友拓址重建

廣福廟在惠濟橋卽鹽橋神姓蔣名崇仁杭人世

仁和縣志卷七

五

居興德坊喜賑施每秋成糴穀預儲貴則賤糶如原價仍許糴者自量歲歉或捐以予飢者死之日囑二弟曰爲人須存仁心力行好事里人相與祠其像以報之人心所趨靈應如響咸淳初賜廟額曰廣福六年安撫潛說友請於朝封神及其二弟皆列侯曰孚順曰孚惠曰孚佑廟屢毀于火而鄉人屢新之石塘胡公長孺作傳天台徐公一夔撰重建記

胡長孺傳

虎林城東北陬巍然石梁駕大河上爲鹽橋民間食鹽由江來舟載至是

攜去以是得名橋顛北橫柵木其下而立屋其上爲廣福廟七十楹門南向土女祠者爭

道出入常樵塞溢橋東西四十餘丈不得行
橋旁民沽酒作餚餽馬豕牛羊二三十家
他祠蓋莫及按舊志孚順侯蔣氏世杭人生
宋建炎間喜賑施穀成熟時糴儲價貴用糴
價賤糴子人不熟捐于人者自幼逮老不變
告二弟存仁心力行好事言已卒人相與立
祠侯家後一百三十一當咸淳三年臨安
尹潛說友以武學生蔣文明若干人之請奏
錫廟名廣福六年尹為侯暨二弟請賜爵皆
列侯尚書祠部考行庸定號曰孚順侯孚惠
侯孚佑侯清熙間又為立祠鹽橋東北尹韓
彥質過杭見民羣聚趨壞祠即日候降尹治
憑老兵辨數甚力彥質趣壞祠即日候降尹治
韓所徙也故老相傳不得侯名字獨記其昆
弟之次為七郎當侯糴糶時使人槩各申其
意因號侯自量廟未賜名之歲有劉宗申晉之
者暴戾士也以縱橫說游蜀荆江淮及為吳
淵潛李曾伯馬光祖客嘗行邊攝資州守怨
曾伯子知衡州事約以杓反告密下杓亡反
狀得他罪致死父納官以贖猶除杓名劉借

仁和縣志卷七

去

七寶寺館焉買妾置券盛陳金銀器飲食妾
父若牙僧夸示多藏奴薛榮刺知藏處夜懷
刀入劉卧中殺劉擇取藏物逃去捕急尹矢
侯日三日不獲榮夷廟毀像榮持錢卜崇德
市而獲榮逃常彷彿見邏人從而後以故不
能去其自疑若有躡之者然他相傳神怪事
甚多獨詳著劉事顛末蓋其事可為世戒胡
先生曰前此四十四年長孺在虎林聞故老
誦說趙忠惠公為臨安尹會城中見口日食
文思院斛米三千石常籍北關天宗水門米
船入四千石賤二千石貴與日食適相若價
固等俟之無不中者為平糶倉二十八厥鹽
橋北糴湖秀蘇常州來置確房春治精善歲
六十萬石視米船入不及日食輒取賤價與
民消拆本錢巨萬竟尹去十三年米價不翔
民不食糶惡駟僧不罹刑辟良尹哉長孺之
母實忠惠姪女忠惠薨長孺九歲七歲時見
公於建康府治眉目清峻如圖畫中古偉人
碩彥今口籍除去乘來與故時亡懸殊若牧
守大效忠惠時規模民亦效孚順昆弟飢歲

尚使弗知
況平歲耶

徐一夔重建記

吾惟穹壤間跂行啄息之徒苟
具方寸間一念所存純一無偽
仰不愧俯不作則其發見施諸明而無不孚
達諸幽而無不格惟神奮起閭閻所為不過
如古貨殖家以市價為術原非有異于人也
但其所存一以濟人利物為心無有私意存
乎其間故其生也惠被于一方而人德之其
歿也福庇于後世而人戴之非僥倖于一時
者所可致也若夫單夫細人以左右望而罔
市利而惟恐不足者或過茲廟仰觀肖像甯
不惕然有警于心而所知所戒哉神降生之日
一方之人會享祠下以祈以報因作享神之
詩使歌以祀神詩曰吳之山兮蒼蒼河之水
今洋洋有廟翼翼兮在河之梁神之來兮不
來目睽睽兮延伫或洽然兮以風或黯然兮
以雨俎有牲兮其牲既滌尊有酒兮其酒匪
醕胾饗潛通兮侯食有所逐畢方兮其去無
踪驅海若兮波濤乃東物不疵癘兮人不暴

仁和縣志卷七

七

凶降福穰穰兮我民攸蒙吳之山兮不改其
色河之水兮其泄湜湜於萬斯年兮惟神之
宅小民祈報兮
歲歲其無斃

忠佑廟去府治北五里在今憲司左即宋岳王故

宅秦檜誣王死獄中女尚幼抱銀瓶投井死俗

呼銀瓶娘子紹興三十一年以王宅為太學立

土神祠以祀王封正顯昭德文忠英濟侯後加

王爵謚武穆寶慶二年改謚忠武事具宋史元

至正中加謚保義并祀其女而俗竟呼為銀瓶

娘子廟

江陰王逢詩

碧梧月落烏號霜寒泉幽咽金井
牀綺疏光流大星白夢驚萬里長

城亡女郎報父收囹圄匍匐將身贖無所宮
家聖明如漢王亥心愧死緹縈女井臨交衢
下通海海枯衢遷井不改銀瓶同沈意有在
萬歲千秋露神彩魂今歸來風颯然趙陵無
樹容唬鵲阿爹
墓木西湖邊

顯祐廟在本縣舊百萬新倉西神姓陳名仁果常
州晉陵人仕隋至司徒沈法興謀叛忌司徒威
名召食毒死之忠憤赫靈竟以神矢斃法興唐
武德初嘉其功封忠烈公至後梁封福順武德
王後周加帝號宣和四年賜常州廟額曰忠祐
咸淳四年安撫潛說友以嘗禱雪祠下昭應如
響仍崇飾廟貌而新之且識其事于壁云咸淳

仁和縣志卷七

六

二年十有二月上將郊見天地命臣祈雪羣望
說友辱以都曹走顯祐行祠卜籤其兆曰黃龍
載書蒼龍負圖天下無事帝王錫符方隅砥平
民物繁夥旣而大雨雪雪已乃霽歲事之夕明
星有爛三靈顧歆由是歲屢豐四方無虞茲固
聖主元臣一德丕格然神之預告太平蓋有不
可度思之妙矣四年說友適尹府乃因舊祠藻
飾之且闢且闔庶以崇瞻依昭靈貺

淮安忠武王祠在前洋街神爲元丞相伯顏方其
統兵平宋之時能以不殺俟宋國母幼君出降

卒保全一城人民生命故死後祠之翰林學士承旨劉敏中撰碑細詳碑文始終爲元頌伯顏功德故刪之

干勝將軍廟在新橋神爲唐將東平王張巡子名亞夫當時以巡死國拜金吾大將軍南陽人也初巡守睢陽時亞夫善出奇敗賊因以干勝名神宋都汴時有廟祀巡亞夫獲附巡廟宋南渡凡汴之有廟皆得祀之于杭杭人既重巡之忠烈因別祀神于新安坊橋鄉人有禱輒應元元統間毀于火洪武間廟僧廣成永懋新之

仁和縣志卷七

九

杭州府儒學訓導何敬撰記

原夫天地之大也日月之明也鬼神人物之幽且顯也而有感通之疾惟忠與孝焉蓋仁者不遺其親義者不後其君忠孝之根于仁義者如此雖庸人孺子孱卒賤隸聞人臣之死忠人子之死孝未有不深羨而吹慕之者此無他秉彝好德之良心自不能已亦以見人心同有此義也況生爲名臣歿爲明神忠孝表表在人耳目者又安得不加敬乎杭之新橋祀干勝將軍唐御史中丞張巡子亞夫也天寶末祿山作亂神父守睢陽以疲卒數萬嬰孤城抗孽胡大小四百餘戰力屈而死可謂雄烈者矣肅宗旌其忠詔贈揚州大都督妻贈申國夫人是時神尙幼拜金吾大將軍神將家子故人以干勝云宋都汴有廟祀巡神實附之高宗南渡遷都于杭凡汴之有廟者皆得祀巡因建廟焉于壽安坊神堂巷封嘉應廟時將遷神爲別祀議者謂得近地爲宜以新安坊橋當闖闖之衝據高爽之地

專祠以妥神像于是伐石爲梁跨水爲基華殿翹深高樓翼然過者悸心入者易慮歲府祠祀有禱輒應神之所錫福于民者非一日矣子嘗謁神祠下登樓而望焉遠則會稽諸山聳峭壁立隱約互見浙之潮水泛溢引流入城透迤曲折自橋下直趨北關商賈水運篙櫓之聲不絕近則湖山之秀與胥母拱峙烟雲之掩藹陰陽之開闔儼然如神駕之往來乎其閒也夫山川之蓄居邑之富人心歸向之誠神之靈也宜哉世俗以能禍福爲靈而不知神之所以靈者則在此而不在彼也昔晉之卞將軍壺父子俱死于蘇氏之難一門忠孝殆與神父子昭耀後先而皆廟享至于今不廢但神父之忠轟轟烈烈特異夫世之所以爲忠者故人敬信尤篤也行者過神之祠瞻神之豫聞神父之偉蹟則忠孝之心油然而生其於風俗亦豈無所裨乎咸淳十年褒封神亭侯仍加福德二字所以昭靈貺也廟舊有碑元正統間居民不戒于火碑毀不存今本廟僧廣成永茂睹其廟宇歲久將圯

仁和縣志卷七

三

乃改而新之亦旣里人郁順彰潘允齊政來請記于子子方職教邑庠以忠孝訓迪弟子及聞順彰等之請辭不獲遂乃詳其說俾書于殿壁用爲忠孝者勸焉錢唐何敬記

助聖廟在忠清里神姓褚諱遂良字登善褚亮之

子世爲杭仁和人初授秦府參軍貞觀十八年

擢黃門侍郎參與朝政永徽五年高宗欲廢后

立中宮遂良直諫以至扣頭流血遭許敬宗奸

言貶爲潭州都督旣又復誣遂良與韓瑗潛謀

不軌竟致死貶所未考何時其里立祠凡里人

有水旱疾疫與夫出入謀爲無不禱之屢著靈

驗郡人周璟彥克具神始末赴京奏請時議

欽允特詔有司舉行祀典如議由是廟宇一新
神靈始慰每歲以春秋仲月擇日記以牲醴府
官主之其祀合用之物額派仁和置辦舊擇羽
流看守近以遠裔入居以奉香火

廣西右參政里人朱公鏞撰碑記

惟杭為浙江首郡郡城之

東北昇平里褚家塘者舊有廟曰助聖祀唐
右僕射褚公遂良累著靈顯邦人祀之特嚴
惟公以顯慶二年秋八月累貶愛州刺史至
戊午冬十一月卒於貶所嗚呼公位宰輔相
高宗致永徽之治未幾以諫立武昭儀關宗
社安危大計終貶遐荒以歿其神宜與名山
大川煜煜列星臨乎宇宙無所不之矣奚獨
眷然茲土乎蓋公郡人也自公以上累世有
家錢塘公雖逝矣而其不逝者神安知獨不
翩然大荒焄蒿悽愴赫然闐然於素所耕釣

仁和縣志卷七

三

之地乎茲去唐將九百載矣郡有水旱則禱
之疾疫則禱之出入起居吉凶災祥又無不
禱之其孚祐宏庇于吾人者尚矣禮曰法施
于民則祀之以死勤事則祀之能禦大災捍
大患則祀之則公之神合于祀典其永血食
于斯土者宜矣謹案唐書公姓褚氏諱遂良
字登善散騎常侍諱亮子也歷官尚書右僕
射高宗即位無忌與公同心輔政上亦尊禮
之恭己以聽故永徽之治百姓阜安有貞觀
遺風及高宗將以武氏進位中宮朝議未決
上召長孫無忌李勣于志寧及公入公曰今
日之召多為中宮上意既決逆之必死太尉
元舅司空功臣不可使上有殺元舅功臣之
名遂良起于草茅無汗馬之勞致位至此且
受顧託不以死爭之何以見先帝入見直
對以皇后無大故不可廢言之剴切不為撓
黜為潭州都督卒立武氏累貶愛州以死公
之忠義大節始終不渝崇廟貌以嚴祀之不
獨以報公艱苦之節亦萬世人心所同然羣
欲尸而祝之而意有不可過者也成化十一

年郡士周璟削削走四千里具祠事本末陳
請于朝肆惟我皇上續列聖洪猷以綱
常為治特詔所司舉行祀典如議僉慨廟
宇隘陋未足以稱國家崇明祀之盛舉也將
謀拓而新之浙江巡按御史維揚張公東魯
李公與藩臬重臣及郡之守臣咸有志於翼
贊風教詢謀僉同工料具舉以廟門麗牲之
碑宜有文詳載厥事乃昇鏞執筆鏞郡人也
仰高于公非一朝夕矧人心義理同然之發
固自有不容己者敢輒詳列如左用為萬世
告

蕭鄧侯祠在睦親坊新慶巷侯姓蕭諱何沛邑人
起自刀筆事沛公後隨沛公至咸陽何先收秦
丞相御史律令圖籍藏之漢王所以能知天下
阨塞戶口多少強弱之處民所疾苦者何之功

仁和縣志卷七

三

也及漢王東定三秦何畱收巴蜀鎮撫告諭後
守關中為法令約束立宗廟社稷宮室縣邑且
轉漕給軍漢既定天下以何功第一封為鄧侯
尙寶司少卿錢塘徐六橋江山撰碑記

杭城西北陬東西壁里有故蕭鄧侯祠祈禱
占卜有靈異與民應答如響客有仕進不達
者過予敘述平生結髮讀書誦習數十萬言
抱負伯玉略而人莫與知今苦無津具言鄧
侯祠神靈即往祀之宜得濟遇也余曰謂何
曰昔人言繫刑獄者祀臬陶臬陶刑官也吾
以為向仕進不達者祀鄧侯達仕者也
昔秦方鼎沸楚漢之勢未分韓淮陰挾持利
器落落不偶惟與蕭相國語知大計一日信
逸去相國追及之信用而楚滅漢興皆相國
之明也其神有知親賢樂士吾即祀之宜必
以追信者追予哉余偉其言居無何有鄧侯

祠道士以重建祠祈子記之予謂昔高帝起豐沛相國沛人也何與食茲土哉雖然吾聞德厚者流光高帝以布衣定漢家四百年大業而相國為之名世史稱其治關中法令約束宗廟社稷縣邑觀若畫一為一王法其法律尚在也至今用之此其英靈之會常與造化元氣流轉于宇宙間惟其凝結所寓耳世稱鄴侯昂星之精是星日照臨下土精之所聚豈有常哉由是而言則相國之祀吾上未為異也按前志是祠肇南宋沿襲至今歲久圯廢正德乙亥封刑部主事張繪長沙二守董璠者民焦富彭鑑輩延長春菴都紀陳宗輔徒湯良佐居守飾治修舉焉嘉靖乙未燬于火道士蔡如樟重建延以聯楹復以重樓環以堂奧周垣庖湏具備以嘉靖辛丑孟夏之吉落成是役之興前刑部員外郎邵經邦以所嗣應與有功力予亦里人也謹為記之禮云有所興者莫可廢也鄴侯祠是為士民禦灾捍患後之人其謹祀之無使懈弛也哉

仁和縣志卷七

三

郡庠生里人吳子元良撰碑記

往予以郡伯之命同修抗志志諸祠廟獨怪夫蕭公之祠之尤也蓋無慮十餘所稱蕭王焉斯則淫且妄矣曷其志或曰神祠東近戒民坊在古為侈人市曹為司憲之衝以公嘗制律有功故立祠報之其然豈其然乎第見造謫者莫不祇畏所者問者咸答如響乙未歲三月燬于鄰火道土禁如樟新之祝舊加飾或疑公未歷茲土祀不續乎豈知古稱暴虐秦為甚煩力役苛則罰焚書籍院儒生壞井田廢封廷民之怨苦十秦深入骨髓窮山極海而無所避之時惟蕭公輔漢祖以龍興誅無道于蛇斷代虐以寬永清四海遂佐炎漢鴻業匹休殷周焉英主自謂不如賢臣守其規制至于廢世祚移賊莽而民猶謳吟思漢卒歸光武夫怨秦者此民也戴漢者亦此民也是故其受害彌深者其感德彌厚茲相國之功不可誣也非所謂以勞定國者與法施于民者與是者宜在祀典夫其功及天下

後世者豈以殊方累代而疑之乎司馬遷曰
位冠羣臣聲施後世與閔天散宜生爭烈矣
班固亦云爲一代之宗臣慶流苗裔蓋
良史所書如此是可記也已故爲記

宋忠烈二侯祠在棗木巷烈文侯姓張諱憲武穆
王部將驍勇絕倫常統兵出戰屢立大功繼忠
侯姓岳諱雲武穆王子自幼膂力過人常持鐵
鎚約重八十餘斤出入行陣所向風靡此二將
素爲金人所畏後因權奸秦檜與金連謀欲殺
武穆以及子雲及部將張憲誣以謀反陰害武
穆於大理獄戮雲憲於眾安橋市曹當時人皆
忿恨不平咸欲誅檜以啖其肉其時二將冤魂

仁和縣志卷七

三

不泯常顯靈於斯地故里人建祠祀之往往得
福得利遂以資福資利名祠至孝宗時武穆冤
白追贈爲鄂國武穆王憲爲烈文侯雲爲繼忠
侯里人改額爲忠烈二侯祠歲久祠圯復加修
葺福建致仕副使里人姚公震撰碑記至正德
十五年巡按御史張公縉志存褒忠下車未久
詢知此祠傾頽已甚不蔽風雨無以安神靈卽
下其事於有司命工商計財費刻日重建復得
里士張檜樂捐隙地以拓祠基是以祠宇敞宏
過者改觀廣東致仕參政鄒公虞撰碑記

二郎神廟在忠清里神姓鄧諱遐字應遠陳郡人也自幼勇力絕人氣蓋當時人方之樊噲桓温以爲參軍數從征伐歷冠軍將軍數郡太守號爲名將襄陽城北活水中蛟數出害人遐拔劍入水蛟繞其足遐揮劍截蛟數段而出自是患息鄉人德之爲立祠祀之以其嘗爲二郎將故尊爲二郎神

按杭非斬蛟之地亦未嘗有功於杭州得立祠必其屢顯靈異于襄或者杭之人曾禱彼祠數有應驗歸語鄉人因立祠未可知也

通聖廟在忠清里宋瓊花園內也神姓褚諱載遂

仁和县志卷七

五

良九世孫性行端潔學問該博鄉邦敬仰先家

廣陵卽今揚州傳得織綾錦法歸寓故里業益以精

人多倣倣迄今環里之人善織綾錦自神始也

歿後顯靈於人忽降筆曰今承上帝之命以吾

忠臣後裔平生正直有善無惡得以廟食瓊花

舊園汝輩知之由是里人相聞郡邑大夫立祠

祀以牲牢題曰通聖凡有水旱疾疫詞訟經營

悉往問禱無不響應

安慶府推官同邑姚震撰通聖廟碑記

杭古吳越交會之地隋建爲州唐因之褚公遂良實州之平安里人貞觀永徽閒直言極

諫有裨治道幸以諫立武氏貶潭州都督後徙桂州未幾貶愛州刺史以死孤忠大節為唐名臣里人敬而慕之立廟崇祀扁曰助聖復以公所居是里既久旋屬眾人乃名其地為褚氏堂崇奉香火不絕迨宋高宗南渡駐蹕于杭詔移廣陵瓊花來植其里故吳慶忌居第舊基創飾園囿立神尸之先是遂良九世孫名載者性行端潔學問該博人咸敬仰其先家廣陵獲織綾錦法世襲為業載歿厥後數顯靈于人復降筆曰今承上帝之命以吾忠臣苗裔喬平生正直有善無惡得以廟食本園汝輩知之于是里人相問郡邑大夫立廟祀之祭以牲牢題曰通聖凡有水旱灾患經營出入禱之無不響應迄今一鄉之人皆織綾錦為業由乎神之始也助聖通聖初皆有碑以紀厥事元季兵火居民凋敝廟宇塌塌碑亦顛覆瓜分獨遺神像風雨剝落土人李用沈榮富虔奉香火年久永樂癸卯二君歎曰神君有唐忠臣之後覆庇吾鄉人多賴之今茲廟貌頽圯神何依焉尚義之士一十

仁和縣志卷七

三

有八乃各捐資鳩工重建以妥精靈冀其神有所主靈有所施郡境平康老幼安謐庶幾助聖與通聖二祠相附密邇一鄉之間孚佑吾人香火傳之永久願不羨與肇始于是歲六月甲子落成于九月丙戌二君又以不可無文以垂告來世乃其實介子友金子士宗徵言勒諸貞珉以侈其傳子既序其神之本來如右復繫之以辭曰存為善兮歿為神保茲士兮仗神靈人樂業兮里安甯替于昔兮隆于今香火永兮人之忱神其靈兮恒來臨園之邃兮聞且深春社祀兮神居歆

顯忠廟在長生橋神乃漢武帝功臣封博陸侯其

廟宇建置始未詳見潛說友舊碑無存惟江浙

鄉進士葉森所撰碑記在橋下記云傳曰聖王

也禦大患捍大灾則祀之有功于民則祀之其所以祀之之意答明貺也若山川社稷之

炳靈故在在尸祝之皆有功于民能禦患捍
災者也是以具名太常勒功冊史而天下羣
祀從有功焉杭之清湖開元宮西有廟曰顯
忠士人稱霍使君祠漢大將軍博陸侯也按
舊志云吳孫皓時神降于庭自言漢霍光求
立祠于金山之鹹塘以捍水患宋紹興初建
行廟于錢塘左三廂之長生橋仍加封忠烈
順濟昭應王質諸宋會要秀州華亭縣小金
山漢霍光祠宣和間賜額曰顯應忠烈順濟
公廟紹興之封異其名號耳初廟基屬民眾
乃鳩錢券其地定為神居棟宇既完禱祠日
盛事無鉅細咸請于神應若影響至嘉泰紹
定間兩有反風滅火之應紀事傳信廟碑具
存國朝元統初夏六月甲申火自朝至于日
中辰始市西坊清湖岸而止焦土者萬有餘
區死如焚如棄如者易可以數計民窘急駭且
震怛望廟以呼如嘉泰紹定之時神赫赫厥
靈颯風遽轉雙瓦不毀廟貌如故暨左右民
克保厥居錢塘縣庫去廟為最近時有司新
刻會要于學子參校讐將完約費五萬餘緡

仁和縣志卷七

七

亦賴以存神之功能如是者不一推而廣之
則禦大患捍大災不難矣詎止有功于民而
已也于是杭之士民裹金葺廟以答明貺猶
以未盡其誠將謀刻詞以紀靈著弘文輔道
粹德真人眉叟王公捐粟為助承務郎遂昌
縣達魯花赤阿剌帖木公施金若干采飾神
像奉議大夫會昌州知州管公彥清為之致
石請文于余辭不獲故得紀其實焉他時守
士之臣能以神功叩請奉常載在祀典與百
神受職則國家受民禮神者至矣神之福斯
民者宜如何哉

揚清祠在忠清里改凝真觀為之蓋其里人王公

僉憲琦素持廉介後致仕家居雖貧甚人有餽

者亦堅辭不受竟以餓死復有同里項公郎中

麒亦以冰蘖終身不受非義致仕後二十七年

僅以饘粥餬口雖至屢空不改顏樂嘉靖二十年知府陳公一貫因前守陳公仕賢嘗建一祠以祀二公扁曰揚清庶不併祀二公於楮僕射之旁奈規制隘陋不稱祀事爲是學之師生白其事於督學孔公得請擬真菴爲之其詳具見於陳公一貫所撰碑二十四年知府嚴公寬同知邱公道明通判劉公希召推官劉公幾章同立石焉

陸一貫撰碑記

傳曰國家之敗由官邪也官之得失寵賂章也然則有能握愉淡砥苦節嚼然不滓惟悴

仁和縣志卷七

天

畢命而弗顧者於以風世豈微也哉蓋予考王項二公遺事有感焉二公俱杭人王公琦永樂中由鄉貢進士爲汝州儒學學正擢監察御史出爲按察僉事致仕貧甚併日而食衣緝紙爲之有司歲時候餽遺堅卧謝不受歲暮大雨雪一夕寒餓卒項諱麒亦鄉進士天順初授南京吏部司務轉北工部營繕員外郎母老陳情就養改南京刑部尋陞郎中乞歸養病家居二十七年饘糜僅糊口然空者屢矣日闔戶抱膝歌吟若充然有得者二公沒久矣杭之人士至今能道其事云嗚呼古有貧士蓋細氓羈旅崎嶇困頓上下無交也若茲二公遇時有祿竟枯槁牖下未之聞矣茲豈予之所謂愉淡苦節之士非耶然今之世豈可少斯人哉初唐忠臣緒太傅者杭人也故杭人卽太傅里爲祠祀之二公實繼產太傅里正德嘉靖之交巡按侍御史唐公表其里曰忠清里而錢塘合王存者緣是併祠二公于太傅之旁嘉靖二十年予從弟仕賢爲杭守則謂其弗專也別建一祠因里名

名祠曰忠清然制頗隘不稱去年冬學官弟子羣請於今董學者憲台孔公事下府時予適繼守府得其近坊疑真菴者議毀其中堂所為像延神祀于中改額曰揚清祠用別褚太傅也又與田十二畝俾二氏歲收其租為守祠費今年春始祀新祠因刻于石

白澤大王廟在純禮坊宋真宗景德年間遼兵入寇寇準倡議請帝親征時六師所食仰給海運準策中尉梁元帥專督漕運行至海中適有猛獸號白澤者出沒海中洪濤巨浪交作運船幾覆忽見空中一神乘龍馬揮鞭驅逐白澤趨服濤浪頓息糧運保全元帥仰荷神庇建祠祀之逮後奏請因敕封為土神

仁和縣志卷七

三

考據 山海經東有望山有澤獸者一名曰白澤能言語王者有德明照幽遠則至昔黃帝巡狩至東海此獸來見云為時除害

糜相公廟在艮山門南神姓糜諱竺字子仲東海胸人祖世貨殖僮客萬人貲財鉅萬初為徐州牧陶謙別駕從事謙卒奉遺命迎先主於小沛後呂布乘先主出拒袁術乃襲下邳虜先主妻子先主轉軍廣陵海西竺進妹于先主為夫人奴客二千金銀貨幣以助軍資先主困匱賴此復振後曹公表竺領嬴郡太守竺弟芳為彭城相皆去官隨先主周旋先主將適荊州以竺為

左將軍從事中郎益州既平拜竺爲安漢將軍
班在軍師將軍之右竺雍容敦雅而幹翮非所
長是以待之以上賓之禮未嘗有所統御後以
弟芳叛關羽迎孫權致羽覆敗竺是時面縛請
罪先主慰諭以兄弟罪不相及看待如初竺慚
恚于病歲餘卒按竺之得封爲神者意其或者
先主感竺扶危濟困刻骨鏤心不幸遭弟叛漢
慙恚而卒故立祠祀之以報其恩義予想汴京
嘗立有此祠高宗南渡建都後亦封爲此處土
神以奉故都香火

仁和縣志卷七

三十

攷據

搜神記曰竺從洛陽歸未達家數十里路
旁見一婦人從竺車求載行可數里婦謝
去謂竺曰我天使也當往燒東海糜竺家感
君見載故以相語因私請之婦曰不可得不
燒如此君可馳去我當緩行日中火
當發竺乃還家遽出財物日中火發

同仁祠改干佛寺爲之事詳干佛寺

諸葛明王廟在官園路神乃蜀之南陽人未考何
故得爲斯地土神嘗攷高宗會要杭之廟食隸
祠官者凡十三而四在畿內曰忠清祚德神應
通惠而旌忠無與豈闕文哉予因思之必其自
汴南渡之後旣已建都于杭凡汴京素奉之香
火有十三悉立廟崇祀或者神之後裔隨駕南

渡不忘乃祖因私立祠以祀之未可知也不然
既非食邑于此鄉又非生長于此鄉何以受祀
於此鄉也哉

興漢帝君廟在雋堰圩神姓項名羽下邳人素與
漢高帝爭天下至勢窮力竭而自斃何嘗有興
漢之心蓋當楚漢爭雄之時使非項羽東征西
伐所在屠毒以致人心怨怒則漢高帝雖素稱
長者而能寬仁恐一時人心未必翕然歸向而
五年未必成帝業也故以魯公禮葬之未知何
時以興漢帝君封爲土神今此鄉有此土神或
者亦因汴京所祀而祀之

仁和縣志卷七

三

晏公廟在武林門北夾城巷內神姓晏名戍仔世
爲江西臨江府清江鎮人元初爲文錦局堂長
解文錦赴上都因病歸登舟卽尸解人以爲神
立祠祀之後顯靈于江湖洪武初封平浪侯神
舊爲崇果寺伽藍元末兵毀洪武四年化主沈
原建蓋草舍雕塑佛像二十三年浙江儲都指
揮因漕運在途蒙佑平安乃捐已俸協同沈原
起造殿宇廊廡一新居民祈禱輒應其殿梁書
名猶存前殿觀音猶是崇果寺故物

潮王廟在芳林鄉又名石姥祠舊志神姓石諱瑰生于唐長慶三年生時靈異逮後江水洶湧強弩未射之先沙漲無節或風怒湍急自城東步行彌望皆海民苦潮害日不安生神奮力築堤以捍水勢雖祈寒暑雨不輟功未就竟死于漸後爲神咸通中官爲立廟封潮王宋宣和間睦寇犯順朝廷以韓世忠禦敵時則陰雲四合聞空中吒咤聲仰見旌幟書石姥潮王之號軍士奮勇大破寇兵嘉熙間潮水潰堤觸岸漂蕩居民人力不能禦京尹趙公與憲躬禱祠下潮復

仁和縣志卷七

三

故道有司上其事加封顯德忠惠王然則石姥潮王四字因見空中旌幟所書世遂稱之然卒未考何以謂之姥也僧誠道原撰昭化寺潮王廟記

順濟聖妃廟在艮山門外攷之廟記神本莆田林都檢仲女自幼不室數著靈異死後祠于莆之聖堆江口白湖宣和五年賜順濟廟額自紹興二十六年封靈惠夫人紹興三年改封靈惠妃慶元四年加助順敕曰古以女神列祀典者若湘水之二妃北阪之陳寶西宮之女南少岳之

夫人以至丁婦勝姑亦皆廟食夫生不出于閭門死乃祠于百世此其義烈有過人者矣靈惠妃宅于白湖福此閩粵雨暘稍愆靡祈不應朕惟望舒耀魄其名月妃川祇靜波其名江妃爾之封爵旣曰妃矣增錫美號被之輪奐崇大褒顯凡以爲民尙報恩以永厥祀嘉熙三年累封爲靈惠助順嘉應英烈艮山有祠自商份感夢始開禧寶慶一再創建又有別祠在候潮門外蕭公橋他如閩廣浙江淮甸凡瀕海之地往往廟焉丁伯桂撰重建廟記

仁和縣志卷七

三

惠順侯廟在江塘嘉定五年二月江湖衝嚙石塘帥漕建廟以禱咸淳二年敕賜忠順廟爲額四年七月壽和聖福皇太后降錢重建廟址陷于海遂廢

順濟龍王廟在湯村鎮政和五年郡守李偃以湯村巖門白石等處江湖侵嚙奏請同兩浙運使劉旣濟措置用石版砌岸因建廟累封靈應昭應嘉應三王廟址陷于海遂廢

申將軍廟在臨平斗門橋北三十步今廟有殘碑宋季人撰謂爲申包胥鄉人于此祈禱多應

考據

申包胥楚大夫也定公四年吳師入郢包胥知楚不能敵乃如秦乞師秦不與包胥依庭牆而哭日夜不絕聲勺水不入口七日秦師乃出救楚楚圍解楚王賞功胥逃賞想舊都亦有此祠宋南渡因遷建于此

楊和大王廟在方輿神姓楊名沂中紹興間賜名

存中字正甫代州崞縣人宋宣和山東河北羣

盜四起存中應募擊賊積功至忠翊郎自幼天

資忠孝勇敢大小二百餘戰身被五百餘鎗屢

立奇功羣將敬伏宿衛出入四十年最寡過高

宗禮遇殊渥孝宗以為舊臣尤禮遇常呼為郡

王而不名祖宗閔父震及母皆死難存中既顯

仁 和 縣 志 卷 七

三

請于朝宗閔諡忠介震諡忠毅賜廟曰顯忠曰

報忠又以家廟祭器為請遂許祭五世前所無

也嘗營居鳳山十年而就極山川之勝後獻于

朝廷更築室焉又葺園亭于湖山之間高宗為

書水月二字出是觀之則廟之在方輿者必祠

在別墅私所崇奉後封以為土神云

周絳侯廟在臨平鎮晉建武元年侯裔孫卓卜居

臨平即其地祠侯建炎中金人犯杭居人為柵

環廟以守仰視旌旗蔽空書曰漢絳侯周勃皆

羅拜遁去自是靈異著聞有禱必應

白龍王廟在臨平東山亦有龍祠在洞側

黑龍王廟在超山宋嘉定閒趙忠獻宰邑時禱雨
屢應請于朝賜額通靈累封通靈惠應宣濟昭
惠侯

靈惠廟在城北舊志神姓陳名項字行嵩會稽人
仕東晉嘗使虜羈留三年仗節不屈拔劍砍臂
後復命于朝歷青揚荆廣四州刺史食邑錢塘
海鹽鹽官三縣卒葬皋亭山因廟焉梁大同二
年封興善又改封崇善紹興中賜廟額靈惠鮑
蠻撰記後以禱雨有應累封至慈佑福善昭應
侯寶祐六年遂列王爵又有行祠在江漲橋鎮
及董家巷